

Акафист
Пресвятой Богородице, читаемый
пред честной иконой Ея
Черниговско-Гефсиманской

Кондак 1.

Избранней от Святыя Троицы, превышей Небесе и земли, Царице Богородице благодарственная песнопения воспеваем. Ты же, Пречистая, яко имущия державу непобедимую, от всяких нас бед свободы и на всякое разумение настави и к деланию заповедей Сына Твоего приведи, да зовем Ти:

Радуйся, Царице Богородице, упование и прибежище наша.

Икос 1.

Во дни оны Пречистая Божия Мати милость Свою граду Чернигову дати восхоте. И се, чудная икона Ея на древе ели явися; тем же и нарицается Черниговская Елецкая. И вернии православнии людие с великою радостью ту икону взяша и Матерь Божию прославиша, глаголюще:

Радуйся, Заступнице усердная рода христианскаго;

Радуйся, Поборнице верных.

Радуйся, яко Тобою радость воссияет;

Радуйся, бесов поражение.

Радуйся, благочестивых озаряющая смыслы;

Радуйся, мудрых века сего посрамление.

Радуйся, море чудес многоводное;

Радуйся, Споручнице грешных усердная.

Радуйся, к Сыну Твоему ходатайство немолчное;

Радуйся, благ вечных Подательнице.

Радуйся, Сокровище многих щедрот;
Радуйся, верных спасение чюдное.
Радуйся, Царице Богородице, упование и прибежище наша.

Кондак 2.

По времени, грех наших ради, сия икона чудотворная утрачена бе; но не до конца прогневая Пресвятая Богородица и милость Свою граду Чернигову паки возврати. И се, иная чудотворная икона во граде Чернигове явися, во обители пророка Божия Илии; тем же и наречена бе Черниговская Ильинская. Мы же, грешнии, милость Пресвятыя Богородицы прославляем, вопиюще: Аллилуйя.

Икос 2.

Многажды прегрешили есмы и каемся трепеща: неужели гнев Господень поразит нас? И паки таяжде творим. И во дни оны святая обитель пророка Илии разорена бе и икона чюдная Пресвятыя Богородицы исчезе. Но и списки ея чтимии мнози по земли Русстей распространишася. Мы же, грешнии и смиреннии, яко видехом милость Пресвятыя Богородицы, вопием:

Радуйся, Агнца и Пастыря Мати;
Радуйся, многих зол избавление.
Радуйся, Царице Небесе и земли;
Радуйся, Упование верных.
Радуйся, Столпе веры непоколебимый;
Радуйся, скорбящих Отрадо и Утешение.
Радуйся, Главизно пророческих словес;
Радуйся, мученик светлая Славо.
Радуйся, в терпении помощь всеильная;
Радуйся, падших восстание.
Радуйся, заблуждших вразумление;
Радуйся, Сокровище благих неоскудное.

Радуйся, Царице Богородице, упование и прибежище наша.

Кондак 3.

Имущи упование на Тя, всех христиан Надежду, благочестивая девица Александра, получивши в дар икону сию честную, во граде Чернигове явлену, пред нею же излиючи всю скорбь души своея, вопиючи: Аллилуйя.

Икос 3.

Имущи ум в Бозе утвержден и Господу Иисусу и Пречистой Матери Его послужити хотящи, девица Александра икону сию во обитель Гефсиманскую, иже при лавре Сергия преподобного, в рукотворенныя пещеры пожертвовати восхоте, да молятся иноци пред нею, глаголюще:

Радуйся, Христа Бога нашего Пречистая Мати;

Радуйся, Утробо Божественнаго воплощения.

Радуйся, превысшая Небесных воинств;

Радуйся, бесов поражение.

Радуйся, человек упование и утверждение;

Радуйся, наше спасение вечное.

Радуйся, мира неустанная Хранительнице;

Радуйся, земли Российския Предстательнице и Защитнице.

Радуйся, в бурех и напастех пристанище;

Радуйся, просвещение во тьме сущих.

Радуйся, в нуждах скорая Помощнице;

Радуйся, иноцев Наставнице.

Радуйся, Царице Богородице, упование и прибежище наша.

Кондак 4.

По прошествии лет Пречистая Дева Богородица сию Свою икону чудесы многими прославити восхоте, да славят людие Московстии благодать Божию, непрестанно зовуще: Аллилуйя.

Икос 4.

Во дни оны благочестивая жена Фекла, тяжцем недугом обдержима сущи и николи же исцеление получитьи сподобльшися, в пещеры Гефсиманстии принесена бе. И абие недуг расслабления остави ю пред лицом людей многих. Тем же и мы благодарно вопием:

Радуйся, всея Вселенная Мати;
Радуйся, скорбей и печалей наших Утоление.
Радуйся, в бедáх и напастех Заступление;
Радуйся, Щите всем чистиим сердцем.
Радуйся, просвещение во тьме сущих;
Радуйся, Надеждо благочестивых неизменная.
Радуйся, Взыскание нас погибающих;
Радуйся, христианом ходатайство благоприятное.
Радуйся, Ниво щедрот многоплодная;
Радуйся, Разума свет воссиявшая.
Радуйся, Живот, Истину и Путь нам показавшая;
Радуйся, яко в Рождестве и по Рождестве Дева пребываеши.
Радуйся, Царице Богородице, упование и прибежище наша.

Кондак 5.

Вси людие Московстии дивящеся, како в пещерах новозданных таковое чудо явися. И абие святитель Иннокентий, стольнаго града Москвы пастырь, сие чудо испытати восхоте. И в беседе с женою Феклою истину уведый, прослави благодать Божию и милость Царицы Богородицы, вопиюще: Аллилуйя.

Икос 5.

От того дне и часа прослави Царица Небесная сию икону Свою чудесы многими; не токмо в земли Московстей, но и паче из многих мест земли Российстей людие притекаху и благодати исцелений сподобляхуся. Тем же и мы благодарно вопием:

Радуйся, благословенная в женах;

Радуйся, благая Вратарнице, Небеса открывающия.

Радуйся, Руно орошенное;

Радуйся, Стено необоримая.

Радуйся, Свеще неугасимая;

Радуйся, чудес Подательнице.

Радуйся, ширшия небес;

Радуйся, Скинии святая, в ней же прославися Господь.

Радуйся, Земле обетования;

Радуйся, Кивоте святыни.

Радуйся, человек естество обожившия;

Радуйся, Хлеб животный нам даровавшия.

Радуйся, Царице Богородице, упование и прибежище наша.

Кондак 6.

Яко иногда от иконы тоя чудеса течаху обильно и людие православнии милости Господни прославляху; сице и ныне мы, недостойнии, Твоя, Владычице, благодеяния согласно славим, вопиюще: Аллилуйя.

Икос 6.

Людие Российстии, благодать Божию славяще и сию икону новоявлену, многими чудесы прославлену, благоговейно лобызающе, вопияху:

Радуйся, Сына Твоего и Бога за нас умоляющия;

Радуйся, ходатайство ко Господу благоприятное.
Радуйся, оружие на врази многовидное;
Радуйся, Покрове овцам Христовым.
Радуйся, духу сокрушенному Отрадо и Утешение;
Радуйся, от напастей вражиих защищение.
Радуйся, Заре света Христова;
Радуйся, возвестившия пленным спасение.
Радуйся, высото несравненная;
Радуйся, горних воинств честнейшая.
Радуйся, Утро, принесшее День;
Радуйся, рождшия Солнце правды.
Радуйся, Царице Богородице, упование и прибежище наша.

Кондак 7.

Егда бури и напасти землю Русскую посетиша, грех наших ради; тогда и обитель Пещерная разорению подвержена бысть. Токмо храм Черниговския Божия Матере, разорения избегнувый, многия люди привлекох, да вопиют пред образом Ея чудотворным: Аллилуйя.

Икос 7.

Егда безбожнии человеци рассверипеша и храм святой и икону чудотворную уничтожити восхотеша; тогда благочестивии работници Московстии, ихже имена Ты, Господи, веси, сию икону у безбожных испросиша; и тии повелеша, икону чудотворную да вóзьмут и в стольный град Москву да принесут. Яко невозможная человеком Богови возможно есть. И ныне мы, грешнии, взываем:

Радуйся, Радосте нечаянная;
Радуйся, в бедáх и напастех скорая Заступнице.
Радуйся, победившия фараона мысленнаго;
Радуйся, благ духовных Подательнице.

Радуйся, к міру горнему Восхождение;
Радуйся, благочестивых человек укрепление.
Радуйся, благаго Промысла сослужительнице;
Радуйся, Церкви Божия укрепительнице.
Радуйся, православных христиан Отрадо и Утешение;
Радуйся, милости неиссякаемый Источниче.
Радуйся, яко к Тебе руке воздеваем;
Радуйся, яко нозе Твои лобызаем.
Радуйся, Царице Богородице, упование и прибежище наша.

Кондак 8.

Егда тии благочестивии работници честную Твою икону взяша и в стольный град Москву принесоша; тогда Ты, Пречистая Богородице, сию икону в храм преподобного Сергия, иже на Рогожках, поместити благоволила еси. И вси людие Московстии со умилением ю лобызаху и милость Сына Твоего прославляху, вопиюще: Аллилуйя.

Икос 8.

Егда Твоя, Владычице, чюдная икона в стольный град Москву принесена бе; тогда людие Московстии ко святыни Твоей стекахуся и со умилением вопияху:

Радуйся, Радосте наша, яко нас покрываеши честным Твоим омофором;
Радуйся, обилие чудес источающия.
Радуйся, за нас грешных Ходатаице неустанная;
Радуйся, праведных утверждение.
Радуйся, похвало иереев благоговейных;
Радуйся, Покрове, ширьший облака.
Радуйся, скорбящих Утешение;
Радуйся, юных вразумление и напутствие.

Радуйся, Свете, во тьме светящий;
Радуйся, уязвлений греховных Целительнице.
Радуйся, райския врата отверзающая;
Радуйся, к Сыну Твоему и Богу благая Путеводительнице.
Радуйся, Царице Богородице, упование и прибежище наша.

Кондак 9.

Во дни оны фиал гнева Господня на землю Русскую, грех наших ради, пролился бе; и мнози храми Божии разорени беша, и мнози иереи Божии убиени беша. Такожде и храм преподобнаго Сергия на Рогожках разорен бе и икона Твоя чюдная, Богородице, изъята бе и где ныне – не вемы. И рыдаху людие Московстии, но и плач свой во упование претворяху, вопиюще: Аллилуйя.

Икос 9.

Во дни оны мнози вернии аки бы приговорени к смерти ся мысляху; но в непобедимем смирении Богородице взываху:

Радуйся, от горя и бед страждущих нас избавляющая;
Радуйся, скорбь и печаль потребляющая.
Радуйся, Хранительнице верных;
Радуйся, заблудших исправление.
Радуйся, тьму греховную разгоняющая;
Радуйся, мрак душ наших просвещающая.
Радуйся, врага спасения нашего поражение;
Радуйся, благая Покровительнице всех с верою к Тебе прибегающих.
Радуйся, радостей Источнице;
Радуйся, всемилостивая Скоропослушнице, преклоняющая слух к молению нашему.
Радуйся, в терпении помощь всесильная;

Радуйся, Купино Неопалимая, сохраняющая нас от огненных стрел лукаваго.

Радуйся, Царице Богородице, упование и прибежище наша.

Кондак 10.

По слову святаго Апостола Твоего, Господи, тамо подаеши неизреченную благодать, идеже множайший процвете грех. И во дни оны огненным испытанием Отечественныя войны землю Русскую Ты, Господи, посетил еси. Но во огненном испытании святая Церковь Твоя возродися и чада ея от уныния воспряша, радостно зовуще: Аллилуйя.

Икос 10.

Яко иногда при Константине Велицем, тако и по прошествии испытания огненнаго войны Отечественныя храми Божии вновь открышася и благочестием просияша; и святая Лавра Сергиева вновь из запустения восста. И Твоя, Пречистая Дево, икона Черниговская, список тоя чудотворныя иконы, в соборе Святыя Троицы помещена бе для почитания верным. И к Тебе, Пречистая, православный народ притекох припадаяй и вопияй:

Радуйся, Радосте наша;

Радуйся, Покрове святой, ширьший облака.

Радуйся, грешных воззвание;

Радуйся, праведных утешение и укрепление.

Радуйся, потопившия фараона мысленнаго;

Радуйся, верным наставление.

Радуйся, міра Обновительнице;

Радуйся, Книго живота вечнаго.

Радуйся, о Тебе бо ликует всякая тварь;

Радуйся, Главизно пророческих словес.

Радуйся, пред Сыном Твоим неусыпная Ходатаице;

Радуйся, пастырей назидание.

Радуйся, Царице Богородице, упование и прибежище наша.

Кондак 11.

Аще и послабление гонением посла Господь, но и мнози обители в разорении и запустении лежаху. Такожде и обитель Гефсиманская, Дом Пресвятыя Богородицы, в разорении бе и людие благочестивии плакаху, но ничесо же сотворити можаху. Но не ведяху, яко близ есть избавление, яко рекл есть Господь: се Аз отворю и никто же затворит. И ныне мы, грешнии и смиреннии, со страхом и верою взываем: Аллилуйя.

Икос 11.

Яко иногда вернии пояху: *Яко по суху пешешествовав Израиль по бездне стопами*, сице и ныне вернии вси препоны проидоша и обитель Гефсиманскую возродиша. Такожде православнии с любовию и радостию взываху:

Радуйся, нам грешным благосердая Споручнице;

Радуйся, яко на Тебе по Бозе все упование наше.

Радуйся, Радосте несказанная;

Радуйся, адовых врат поругание.

Радуйся, Цвете неувядаемый;

Радуйся, веры и слез воздаяние.

Радуйся, Архангельский глас приемшия;

Радуйся, яко Тебе ублажат вси роди.

Радуйся, о Тебе же ликует всякая тварь;

Радуйся, Тебе же превозносит ангельский лик.

Радуйся, верных Державо;

Радуйся, Надеждо христиан неизменная.

Радуйся, Царице Богородице, упование и прибежище наша.

Кондак 12.

Яко и́ногда в вѣце девятнадцатомъ, такожде и в вѣце двадцатомъ Пресвятая Богородица братство иноцев собра; и во утешение и во укрепление имъ мощи преподобнаго Варнавы, старца утѣшителя Гефсиманскаго, обрести и прославити благоволила естъ. И нынѣ мы, недостойнии, к его многоцелебнымъ мощамъ припадающе, благодарно вопиемъ: Аллилуйя.

Икос 12.

По времени иное благодеяние Пречистая Божия Мати обители Своей дати восхоте; и Свою честную икону, чтимый списокъ тѣхъ чудотворныхъ иконъ Черниговския Гефсиманския, из обители преподобнаго Сергия в Свою обитель Гефсиманскую пренести повеле. И братие и вси вернии возрадовашася и ко Пречистой Богородице вопияша:

Радуйся, Пречистая Мати;

Радуйся, яко в насъ маловерныхъ веру в Сына Твоего и Господа укрепляющия.

Радуйся, яко насъ немощныхъ любиши и славити Господа научающия;

Радуйся, Препоблагословенная во веки.

Радуйся, о Тебѣ же ликують силы небесныя;

Радуйся, Главизно спасения нашего.

Радуйся, Тебѣ же возноситъ Апостольскій ликъ;

Радуйся, яко вседержавному Покрову Твоему себѣ вручаемъ.

Радуйся, верныхъ нерушимая Державо;

Радуйся, яко с высоты Небесныя на смиренныя рабы Твоя призирающия.

Радуйся, юныхъ научение и укрепление;

Радуйся, благочестивыхъ утешение.

Радуйся, Царице Богородице, упование и прибежище наша.

Кондак 13.

О, всепетая Мати, рождая всех святых святейшее Слово! Нынешнее приемши приношение, от всякия избави напасти всех и будущия изми мѹки, о Тебе вопиющих: Аллилуйя.

Этот кондак читается трижды. Затем читается икос 1-й и кондак 1-ый

Молитва.

К кому возопию, Владычице наша, Пресвятая Богородице, к кому прибегну в печали моей, аще не к Тебе, Заступнице всех труждающихся и обремененных? Кто плач мой и воздыхание мое примет, аще не Ты, Помощнице и Покровительнице рода нашего? Услыши и ныне моления наша, Тебе приносимыя, буди нам отрада и утешение, всех благ подательница. Управи житие наше, якоже веси. Буди покров милости Твоя на нас, грешных. И ныне мы, смиреннии, благодарно вопием:

Радуйся, Радосте наша, покрый нас от всякого зла честнѹм Твоим омофором. Аминь.

Молитва иная

О Пресвятая Дево, Мати Христа Бога нашего, Царице Небесе и земли! Вонми многоболезненному воздыханию душ наших, призри с высоты святыя Твоя на нас, с верою и любовью поклоняющихся пречистому образу Твоему: се бо грехми в пучину погружаеми и скорбьми обуреваемы, взирающе на Твой чудотворный образ, яко живей Ти сущей с нами, приносим смиренная моления наша. Не имамы бо иныя помощи, ни инаго предстательства, ни утешения, токмо Тебе, о Мати всех скорбящих и обремененных. Утоли скорбь нашу, настави на путь правый нас, заблуждающих, уврачуй болезную сердца наша и спаси безнадежных, даруй нам прочее время живота нашего в мире и покаянии проводить, подаждь нам христианскую кончину и на Страшнем Суде Сына Твоего и Бога нашего явися нам милосердая Заступница, да всегда поем, величаем и славим Тя, яко благодную Матерь рода христианскаго, со всеми угодившими Богу. Аминь.